

# श्री हनुमान चालीसा

## ॥ दोहा ॥

श्रीगुरु चरन सरोज रज, निज मनु मुकुरु सुधारि।  
बरनउँ रघुबर बिमल जसु, जो दायकु फल चारि ॥

बुद्धिहीन तनु जानिके, सुमिरौं पवन-कुमार।  
बल बुद्धि विद्या देहु मोहिं, हरहु कलेस विकार ॥

## ॥ चौपाई ॥

जय हनुमान ज्ञान गुन सागर।  
जय कपीस तिहुँ लोक उजागर ॥1 ॥

राम दूत अतुलित बल धामा।  
अंजनि-पुत्र पवनसुत नामा ॥2 ॥

महावीर विक्रम बजरंगी।  
कुमति निवार सुमति के संगी ॥3 ॥

कंचन बरन बिराज सुबेसा।  
कानन कुण्डल कुंचित केसा ॥4 ॥

हाथ बज्र औ ध्वजा बिराजै।  
काँधे मूँज जनेऊ साजै ॥5 ॥

शंकर सुवन केसरी नंदन।  
तेज प्रताप महा जग वंदन ॥6 ॥

विद्यावान गुनी अति चातुर।  
राम काज करिबे को आतुर ॥7 ॥

प्रभु चरित्र सुनिबे को रसिया।  
राम लखन सीता मन बसिया ॥8 ॥

सूक्ष्म रूप धरि सियहिं दिखावा।  
विकट रूप धरि लंक जरावा ॥9 ॥

भीम रूप धरि असुर सँहारे।  
रामचंद्र के काज सँवारे ॥10 ॥

लाय सजीवन लखन जियाये।  
श्री रघुबीर हरषि उर लाये ॥11 ॥

रघुपति कीन्ही बहुत बड़ाई।  
तुम मम प्रिय भरतहि सम भाई ॥12 ॥

सहस बदन तुम्हरो जस गावैं।  
अस कहि श्रीपति कंठ लगावैं ॥13 ॥

सनकादिक ब्रह्मादि मुनीसा।  
नारद सारद सहित अहीसा ॥14 ॥

जम कुबेर दिकपाल जहाँ ते।  
कवि कोविद कहि सके कहाँ ते ॥15 ॥

तुम उपकार सुग्रीवहिं कीन्हा।  
राम मिलाय राज पद दीन्हा ॥16 ॥

तुम्हरो मंत्र विभीषण माना।  
लंकेश्वर भये सब जग जाना ॥17 ॥

जुग सहस्र योजन पर भानू।  
लील्यो ताहि मधुर फल जानू ॥18 ॥

प्रभु मुद्रिका मेलि मुख माहीं।  
जलधि लांघि गये अचरज नाहीं ॥19 ॥

दुर्गम काज जगत के जेते।  
सुगम अनुग्रह तुम्हरे तेते ॥20 ॥

राम दुआरे तुम रखवारे।  
होत न आज्ञा बिनु पैसारे ॥21 ॥

सब सुख लहै तुम्हारी सरना।  
तुम रक्षक काहू को डरना ॥22 ॥

आपन तेज सम्हारो आपै।  
तीनों लोक हाँक ते काँपै ॥23 ॥

भूत पिशाच निकट नहिं आवै।  
महावीर जब नाम सुनावै ॥24 ॥

नासै रोग हरै सब पीरा।  
जपत निरंतर हनुमत बीरा ॥25 ॥

संकट तें हनुमान छुड़ावै।  
मन क्रम वचन ध्यान जो लावै ॥26 ॥

सब पर राम तपस्वी राजा।  
तिनके काज सकल तुम साजा ॥27 ॥

और मनोरथ जो कोई लावै।  
सोई अमित जीवन फल पावै ॥28 ॥

चारों जुग परताप तुम्हारा।  
है परसिद्ध जगत उजियारा ॥29 ॥

साधु संत के तुम रखवारे।  
असुर निकंदन राम दुलारे ॥30 ॥

अष्ट सिद्धि नौ निधि के दाता।  
अस बर दीन जानकी माता ॥31 ॥

राम रसायन तुम्हरे पासा।  
सदा रहो रघुपति के दासा ॥32 ॥

तुम्हरे भजन राम को पावै।  
जनम जनम के दुख बिसरावै ॥33 ॥

अंत काल रघुबर पुर जाई।  
जहाँ जन्म हरि-भक्त कहाई ॥34 ॥

और देवता चित्त न धरई।  
हनुमत सेइ सर्व सुख करई ॥35 ॥

संकट कटै मिटै सब पीरा।  
जो सुमिरै हनुमत बलबीरा ॥36 ॥  
जय जय जय हनुमान गोसाईं।  
कृपा करहु गुरुदेव की नाई ॥37 ॥  
जो शत बार पाठ कर कोई।  
छूटहि बंदि महा सुख होई ॥38 ॥  
जो यह पढ़ै हनुमान चालीसा।  
होय सिद्धि साखी गौरीसा ॥39 ॥  
तुलसीदास सदा हरि चेरा।  
कीजै नाथ हृदय महँ डेरा ॥40 ॥

## ॥ दोहा ॥

पवन तनय संकट हरन, मंगल मूरति रूप।  
राम लखन सीता सहित, हृदय बसहु सुर भूप ॥